

SCOLA

## Iscrizions a scola e scolina

*Ge vel fèr l'iscrizion online sul portal de Vivoscuola. La Scolina de Sèn Jan verc si ujes ai genitores en mercol ai 18 de jené*

L'é temp de pissèr a la iscrizions di bec a scolines e scoles. La Provincia de Trent à fissà l termin per la iscrizions a la scolines ai 31 de jené e na di dant enveze, ai 30 de jené, per l prum an de la populères, mesènes (se l scolé vegn da n auter istitut) e scola autes.

La iscrizions vegn fates online, travers l portal [www.vivoscuola.it](http://www.vivoscuola.it), con SPID, CIE o tessera sanitàera/chèrta provinzièla di Servijes.

Per chel che vèrda la scolines dant dai 31 de jené se pel scriver ite i bec ence al servije più lonch del

orarie o al sperlongiamet de n meis del calandèr de scola per l istà del 2023. Per se scriver ite a la scolina la families no cogn paèr nia, ge vèl paèr na quota demò per la mensa e per l servije sperlongià. Chesta quota vegn calcolèda aldò del sistem de valutazion de la condizion economica de familia (ICEF). Per l an de scola 2023/2024 la agevolazions del cost vegn calcolèdes en automatich, senza cogner prejentèr desche i etres egn na domana spezifica al CAF, con la prejentazion online de la domana de iscrizion duran la declarazions



*Bec a la scolina.*

archivio Offite stampa PAT

ICEF jà desponiboles che se referesc ai valores de redit e patrimonie del 2021.

En mercol ai 18 de jené da les 13.30 a les 15.00 la Scolina de Sèn Jan verc si ujes per ge fèr veder ai genitores la sezions e la ativitèdes che fèsc i bec. Sarà a la leta ence dotrei comembres del Comitad de Gestion se fossa de besegn de domanèr informazions.

Per chel che vèrda la scoles l'iscrizion é obligatoria per l prum an de scola populèra e l prum an de scola auta o profesionèla.